

## 5

### 敬畏上帝 ê 榮光

耶穌聽 tiòh 就講：「Chit-ê 病 bē 致到死，這是為 tiòh beh 顯明上帝 ê 榮光，  
hō 上帝 ê Kiáⁿ tùi chit-ê tãi-chì 得 tiòh 榮光。」  
（《全民台語聖經》約翰福音 11：4）

這是 oh 得相信 ê tãi-chì：上帝 hō 拉撒路死，只是為 tiòh beh hō 耶穌 ē-tàng 實行一個 koh 活 ê 奇蹟；á 是上主 hō 一個人 chheⁿ-mê，只是為 tiòh beh hō 耶穌 ē-tàng 醫治伊（參考約翰福音第 9 章）。M̄-koh，ē-tàng 肯定 ê 是 chiah-ê 悲傷 ê 事件有提供特別 ê 機會，hō 耶穌展示宇宙 ê 創造者—上帝 ê 權柄 kah 疼。

一個人死去 à，耶穌 hō 伊 koh 活；一個人 bē-tàng 看見，耶穌 hō 伊看見。透過 chiah-ê 醫治 ê 奇蹟，上帝 ê 榮光顯現，hō 咱有機會 thang 來認 bat hit-ê 榮光，kah 接納耶穌做救主。約翰 án-ne 解說為啥物伊會記錄 chiah-ê 奇蹟：「是 beh hō lín 信耶穌是基督，是上帝 ê Kiáⁿ，koh hō lín 通過信，靠祂 ê 名來得 tiòh 活命。」（約翰福音 20：31）。咱無需要知影奇蹟是 án 怎完成，á 是說明所有經文記載 ê 是 án 怎發生 ê；咱 kan-taⁿ 必須承認有關上帝 kah 伊 ê Kiáⁿ 耶穌基督 ê 真理。

當猶太人 ê 宗教領導者質問 hit-ê 以前 chheⁿ-mê ê 人，koh 指控耶穌是一

個罪人 ê 時，hit-ê 人回答講：「祂是有罪 ê 人 á m̄ 是，我 m̄ 知。我 kan-taⁿ 知一項 tãi-chì：以前我 chheⁿ-mê，taⁿ 我會看見。」（約翰福音 9：25）。實際上，伊是講，「Oeh，我 m̄ 是神學家。我 m̄ 知 án 怎分析經文，á 是解釋先知 ê 話。所有我知影 ê，tòh 是有一個奇蹟發生 tī 我 ê 身上。」

咱 mā ē-tàng 根據聖經對耶穌 ê 生活 kah 宣教 ê 記載，對耶穌基督有信心。當咱讀 tiòh chiah-ê 奇蹟 ê 時，咱 mā ē-tàng 見證上帝 ê 權柄 kah 榮光，koh 用敬畏 kah gōng-giáh 來回應上主。

祈禱：上主 ah，不管我對 chiah-ê 故事有 gōa 熟，求祢幫助我 ē-tàng 感受 tiòh in ê 衝擊，koh 沉迷 tī 祢 ê 榮光；tú 親像 chiah-ê 奇異神蹟所顯露出來 ê 全款。求祢 hō 我 ê 心 bē 搖動，深信 hit 位 hō 死人 koh 活 kah hō chheⁿ-mê ê 看見 ê 耶穌 mā beh tiàm tī 我 ê 心內，hō 我身邊 ê 人有充實 koh 喜樂 ê 生活。我奉耶穌榮光 ê 名祈禱。阿們。

（1995.10.01）